

# Nos bandera rondona cu misterio prome cu su aprobacion y te cu awe

Awor cu nos celebracion di himno y bandera ta tras di lomba, ta bon pa comenta un biaha mas riba e "**bandera original**" cu a pronk cune for di dia 11 di e luna aki. Cual "**bandera original**"? Ta awor despues di 28 aña por fin Aruba a haya **SU "bandera original"**?

Mi a core rond di Aruba busca e "**bandera original**" y si mester a haya un di nan, ta "**microscopo**" tabata tin mester pa busca esaki. pasobra ta tur sorto di color blauw y geel mi a mira y mayoria no tabata cuadra cu e midinan tampoco.

Den transcurso di añanan mi a publica varios vez riba dje y mas tempo pasa, mas verdad ta sali y na mes momento parce cu e "**misterio di maart 76 ta sigui awe ainda**".

Casi 30 aña nos a tende di "**United Nations Blue**" y awor ta tende di "**Larkspur**" color cu for di 1991 no por a drenta ningun hende pasobra e "**United Nations Blue**" a keda graba den mente di tur hende. Esey tabata e deseo directo y indirecto di Betico Croes (q.e.p.d.)

Pero e color blauw "**Larkspur**" no ta riba ningun di nos banderanan y ningun bandera den Caribe tampoco. Radicalmente!

E United Nations Blue mes, for di cuminsamento tabata tin problema cune na 1976.

Ta masha bunita pa bisa cu e decreto ta menciona cu e "**color ta Larkspur**" segun diccionario "**British Council Dictionary of Colour Standards**", bao di tal number y cu e geel, "**Bunting Yellow**" ta bao di tal number y cu e corra "**Union Jack Red**" ta bao di tal number. Pero e banderanan mes tin e colornan ey?

Mi edad ta subi, y mi mente kizas por ta bay atras segun edad, pero asina leeuw cu hende por kere, mi no a yega ainda.

28 Aña despues di aprobacion, ainda tin **MISTERIO**. Tabata tin misterio prome cu e aprobacion, despues di e aprobacion, y awe ainda tin **MISTERIO** rond di verdad di e bandera.

Den publicacion siman pasa gobierno ta menciona cu hopi diseño no ta cuadra segun decreto di 16 di maart 1976.

Lagami pone un punto cla aki. Ta e **DISEÑO** a wordo aproba dia 16 di maart, den loke ta wordo yama un "**Raadsbesluit**". E bandera a keda huerfano un aña largo sin **DECRETO**.

E Raadsbesluit a bira decreto na 1977, 14 di maart.

Dia 16 di maart 1976, ningun hende a wak e bandera e fecha ey ainda ( *cu excepcion di e man yen cu tabata sa cu tin bandera na Aruba* ).

E mayoria den Consejo Insular (MEP cu 12 asiento) a aproba esaki den un hecho político, y cu yen di pregunta pa contesta di AVP y PPA cu tabata hari scondi scondi.

Durante e reunion, AVP y PPA no por a wanta e secreto cu nan tabata tin y a tira esaki den e reunion puntrando: unda ta traha e banderanan, cuanto lo traha, kende ta paga, cuanto lo paga etc. y despues nan a tira e bom.

**"Pakico anto tal hendenan a viaha pa Medellin?"**

A ser contesta e ora ey cu "**nan a viaja sperando aprobacion y ENCARGO pa laga traha e banderanan**".

Dia 18 di maart, e grupo a yega Aruba cu e banderanan, y hasta a paga pa kilo di mas di carga. ( *check copia di e recibo* ) Kico e ta?

A paga pa e banderanan 3579,80 dollar. E persona cu a firma pa Colombia e tempo ey no tabata Estampados Colorama tampoco, pero un sr. Sergio Duque.

By the way, y documento di pago a wordo skirbi na nomber di un comerciante y a white out esaki y pone e otro nomber di un di e grupo riba dje. E recibo ta di dia 17 di maart 76.

Con e banderanan lo por a bin di Merca despues di 16 di Maart cu a aproba e decreto? segun version di Bollinger?

Den un dia y mey ta dificil pa traha e banderanan aki na Merca y transporta nan pa Aruba pa nan ta aki pa e inauguracion.

E banderanan di Estampados Colorama di Medellin a yega dia 18 cu e grupo y tabata consisti di 10 mil banderin di cualnan 3815 tabata regalo, 40 di 1.50 pa 0.80 meter y 5 di e grandinan. Hunto cu nan a bini 40 dozijn di flanel y 30 dozijn di shorts y mester a paga pa 40 kilo di mas di carga. Pesey tabata core e rumor e tempo ey cu banderanan lo a drenta di contrabando. y e colornan tabata varia, tanto den blauw como den geel.

## BANDERA A DRENTA SCONDI

Prome cu e banderanan di Medellin a drenta, ningun hende tabata sa cu **E BANDERA A DRENTA ARUBA CABA** y cu Betico Croes (q.e.p.d.) tabata tin nan caba prome cu e reunion di Consejo Insular...

Pues mientras cu tabata debati y e kerencia tabata cu no tin bandera, y cu lo inaugura un bandera cu no tey, ya na Aruba tabata varios bandera y di varios tamaño.

Esaki pasobra e experto americano cu a asisti e comision, Sra. Sarah Bollinger di Flag Research Institute di Boston. Sr. Betico Croes, Sr. Harry Croes y un di cuatro persona, den tur secrecia a bay aeropuerto algun dia prome caba pa busca e banderanan cu a bini for di Boston cu American Airlines. Mi por menciona hasta e douanero cu a asisti pa laga nan pasa sin cana e camindanan normal di carga.

Dia 16 di maart anochi reunion a caba 9 or anochi despues di aprobacion di e "**raadsbesluit**". Pero 8.20 or a bin yamada for di Colombia caba riba kico ta kico y e mes persona aki a yama atrobe 12.07 pa mas informacion for di Colombia y a informa cu nan ta cla y cu dia 18 e banderanan ta na Aruba. Na Colombia nan a hospeda na **Hotel Nutibara** di Medellin.

Aki mi tin cu menciona cu e mes persona di e grupo cu a bay Colombia, a yama for di Colombia dia 13 pa 9.30 or mainta pa papia cu hefe di Servicio di Informacion di Gobierno, kende tabata den un di e comisionnan, pa haya informacion.

Dia 18 di maart 1976 ta un coremento formal tabata tin rond di nos isla pa reparti banderanan y pa anochi inaugura esaki.

Di e publicacion di siman pasa di e asina yama "**bandera original**" cu a laga traha y cu un hulandes a bin bisa cu e blauw ta Lakspur locual e no ta, ta solamente e midi nan ta corecto y cu a ripara cu a tene cuenta cu esaki e aña aki si.

E contacto cu Medellin no a termina na 1976 tampoco pasobra na 1981 a bolbe encarga 5000 bandera eynan y na 1982 atrobe tabata tin e contactonan pa 5000 mas.

Nos prome decreto a papia di Lakspur (ook genaamd, United Nations Blue), na 1991 a cambia esaki pa Lakspur di manera cu awe no por papia mas di United Nations Blue pasobra esaki ta enpugna cu e decreto.

Esaki ta djs un parti riba nos bandera. Nos himno tambe tin su "**cosnan chiquito**" cune. Por ehemplo, nos himno a keda 15 aña huerfano prome cu a dune un backup legal den un decreto, y nos escudo? Esey tambe tin su "**cosnan**" pa bin dilanti ainda "**some-day!**"

## E 15 MIL FLORIN PA ORQUESTA

Pa termina e columna awe, mi kier referi un biaha mas riba e comentario anterior caminda a menciona e 15 mil florin cu a paga pa Orquesta Nacional toca riba Dia di Betico. Ta un musico a ponemi na altura y mi a confirme despues riparando cu mi no tabata completamente corecto den mi ponencia.

**NO TA** orquesta di **Scol di Musica Rufo Wever**, cu a ser paga 15 mil florin. E suma menciona no a bay pa e school di musica aki.

E orquesta a toca bierda pa celebracion di 50 aña di existencia di e school, conoci anteriormente como **Arubaanse Muziekschool**, pero no ta orquesta di e school aki.

Pa e manifestacion cultura e school a ser puntra pa **NAN** orquesta toca, y a wordo splica cu no ta **NAN** orquesta. Ta un musico a hinca e orquesta aki den otro y ta e ta encarga cune. Pues e suma cu a ser paga pa actuacion di Orquesta Nacional, no ta na **AMS, Scol di Musica Rufo Wever**, manera erroneamente mi a menciona.

E docentenan di e school no a reclamami ría e erronan y zundrami, sinembargo, mi ta pidi disculpa na nan pa mi error.

Pero si mi ta keda para ariba cu si por paga e orquesta e suma aki, lo por paga e otro artistanan bon paga tambe pa nan presentacionnan, y no den forma di "**coopera cu nos, coopera cu nos cultura, nos no tin fondo.....**"..